

氏族典第三百四十一卷

劉姓部列傳十五

明一 劉基

按名山藏勳封記誠意伯劉基青田人以客應聘察乾象畫計定天下洪武三年授開國翊運守正文臣資善大夫護軍誠意伯祿二百四十石不世二十三年予世基孫鴈嗣卒法柜曇凡三世不世景泰三年錄七世孫祿世五經博士弘治十五年錄九世孫瑜處州指揮使嘉靖十一年進瑜誠意伯祿七百石再與誥券身免二死子一死二十八年瑜孫世延嗣

劉成

按明外史茅成傳劉成靈壁人以統兵總管從定長興爲永興翼左副元帥李伯昇以十萬衆來攻戰死

劉仁本

按明外史方國珍傳黃巖劉仁本字德元元末中進士乙科歷官江浙行省左右司郎中入國珍幕

國珍海運輸元寶仁本司其事朱亮祖下温州時獲仁本以還太祖數其罪鞭背潰爛死

劉仲質

按明外史崔亮傳劉仲質字文質分宜人洪武初爲宜春縣訓導擢翰林典籍十五年拜禮部尙書改華蓋殿大學士坐事貶御史後以年老致仕仲質爲人厚重篤實博通經史文體典確不尙浮藻

劉三吾

按明外史劉三吾傳三吾茶陵人也初名崑後名如孫字三吾以字行兄耕孫壽孫皆仕元耕孫寧國路推官長槍賊陷寧國死焉壽孫常寧州學正武岡洞獠寇常甯亦死之三吾遊兵廣西行省承旨授靖江教授遷儒學副提舉明兵下廣西乃歸茶陵洪武十八年以茹璠薦召授左贊善累遷翰林學士三十年主考會試榜發泰和宋琮第一北士無預者旣而諸生上言三吾等南人私其鄉帝怒戍邊建文初召還卒

劉惟謙

按明外史周禎傳劉惟謙不詳何許人吳元年以才學舉由大理少卿歷廣西四川參政入爲刑部

尙書後坐事免

劉敏

按明外史端復初傳劉敏者蕭寧人舉孝廉爲中書吏後爲楚相府錄事擢拜工部侍郎改刑部出爲徽州府同知有惠政卒於官

劉崧

按明外史劉崧傳崧字子高泰和人舊名楚元末舉於鄉國初改今名洪武三年舉經明行修授職方郎中遷北平按察副使以廉慎爲先坐事爲胡惟庸所謫輸作京師尋放歸惟庸誅徵拜禮部侍郎尋致仕歸踰年徵爲司業卒福王時追諡恭介

劉辰

按明外史劉辰傳辰字伯靜金華人少負氣節喜功名太祖下婺州首上謁署典籤以親老辭歸建文中用薦擢授監察御史出知鎮江府永樂初遷江西左參政辰居官廉勤尙氣與都司按察使不相得坐免歸召至京疾作歸道卒

劉子華

按萬姓統譜子華字昭甫明春秋工爲詩詞洪武初以明經薦太祖御奉天門召見命賦開平王常遇春挽詩子華卽承詔賦詩少選而成其詩揮戈十載定河山忽報星沈易水灣馬首西風旌旆捲天涯落日凱歌還功成楚漢興亡際名在彭韓伯仲間聖主思功心獨苦黃金直欲鑄眞顏大稱旨授大興同知改青州推官政績懋著子仕諤郡學生未弱冠領鄉薦及廷對太祖覽其策曰有用之才也乃賜進士及第授翰林院編修

劉迪簡

按江西通志迪簡字簡卿安福人洪武改元上書撰大學旨要進呈差往汴陝訪採前代政績筆削成書以獻二年復差往交趾竣事沒於南寧

劉季道

按江西通志季道吉水人洪武初爲起居注陞浙江按察司僉事發摘陰伏機敏如神尋以剛直忤權貴下獄死

劉廣

按羅田縣志廣本縣多雲人洪武初以軍功授指揮僉事守永平適有寇警廣於城北力戰死之

劉允

按葛姓統譜允字子允當塗丹湖人師事李翼洪武四年以進士及第授懷慶通判三年以直道不偶謫瑞安縣丞在官興學勸農均徭理訟克當人心超拜北平按察司副使考績留教授親王於內後請老卒於家允不獨政事之才綽乎有餘地其爲人允侃侃善議論每召對多稱旨博學喜吟咏實而不俚蓋似其爲人也

劉璉

按明外史劉基傳基子璉字孟藻有文行洪武十年試監察御史出爲江西叅政爲胡惟庸黨所劾墮井死子鴈字士端嗣伯坐事戍甘肅赦還永樂間卒子法停襲

劉璟

按明外史劉基傳璟字仲璟基次子洪武二十三年以爲閤門使谷王就封擢爲谷府左長史靖難

兵起璟參李景隆軍事景隆敗璟歸成祖卽位召璟稱疾不至逮入京下獄自經死福王時諡剛節

劉仕貍

按明外史劉仕貍傳仕貍字伯貞安福人父開開兄闕弟闕閭皆爲元官獨開不仕仕貍洪武十五年應賢良舉授廣東按察僉事仕貍廉且惠愛輕徭理枉大得民和朝議省僉事官例降改授東莞河泊使發憤得疾遭風沒於水

劉宗道

按龍溪縣志宗道名駟初字良御以字行洪武十五年以秀才應召廷試第一拜左都御史父卒奔喪至武昌哀痛迫切赴水死

劉季簾

按明外史劉季簾傳季簾名韶以字行餘姚人洪武中進士除行人擢陝西左叅政建文中召爲刑部左侍郎永樂八年坐失出下獄左遷兩淮鹽運副使逡巡未行復下獄久之始釋尋授工部營繕司主事卒於官

劉觀

按明外史劉觀傳觀雄縣人洪武十八年進士授太谷縣丞以薦擢監察御史遷左僉都御史坐事調嘉興知府丁父憂去永樂元年拜戶部右侍郎二年調都察院左副都御史六年擢禮部尙書改刑部十三年改左都御史仁宗嗣位加太子少保出視河道御史交章劾觀並其子輻諸贓污不法事帝怒謫輻戍遼東而命觀隨往觀竟客死

劉儻

按明外史劉儻傳儻字子士江陵人洪武十八年進士除兵部主事歷郎中二十八年擢右侍郎建文時爲侍中成祖卽位進尙書永樂四年大征安南以儻參贊沐晟軍務六年晟與簡定戰敗績儻襲賊至大安海口後軍不繼賊圍之數重被執不屈死仁宗卽位賜諡節愍

劉傑

按萬姓統譜傑江陵人節愍公儻之弟幼敦行義宗黨咸以孝悌稱洪武間以經明行修舉試優等授吏科給事中論劾無避諸有私愆者皆畏恐其知之陞雲南參議興利去弊民夷畏服致仕歸甚

貧

劉謹

按名山藏本行記謹山陰人洪武中父謫戍雲南伯兄又以督運死謹方六歲問家人曰雲南何方家人告其向輒朝夕西南遙拜年十四歲矍然曰雲南雖號萬里天下有無父之子哉治裝往尋時滇夷初服道路梗塞衆勸勿行不能已也歷六月至其處遇父逆旅舍相持號慟行道傷悲俄父患瘋痺卽欲以身代戍而國法丁壯十六歲以上又嫡長男始得代於是復歸攜其伯兄子往而伯兄子孱弱未能自立又復歸悉鬻其家貲往蓋三返雲南始得歸父歸家徒四壁力供菽水晨昏極其歡孝其後子孫科第相繼人稱天道

劉淵然

按明外史劉淵然傳淵然贛縣人幼出家爲祥符宮道士後詣雩都紫陽觀師趙原陽傳其法能呼召風雷洪武二十六年太祖聞其名召之賜號高道館朝天宮永樂中從駕至北京仁宗嗣位賜號冲虛至道元妙無爲光範衍教莊靜普濟長春真人宣德初進號大真人七年乞骸骨命送南京朝

天宮卒淵然有道術爲人清靜自守不干世事故爲累朝所禮

劉有年

按萬姓通譜有年沅州人洪武中以明經爲州學訓導當道者奇其才薦陞監察御史激揚有聲擢
太平府知府永樂中上儀禮逸經十有八篇未幾轉交趾按察司僉事時黃福以尙書掌司事重其
爲人俄以疾卒福哭而祭之曰江淮胸次洙泗規模文希韓柳學祖程朱

劉亨

按萬姓統譜亨字嘉會廬陵人洪武中授壽州訓導建文初陞武進縣丞靖難後棄官宣德中召不
起正統中卒

劉江

按萬姓統譜江桃源人洪武中任燕山中護衛百戶後從兵靖內難累立戰功進陞中府都督

劉達

按萬姓統譜達項城人性寡默善書翰家世以忠孝相承鄉邦稱之洪武間以人材舉薦累官至刑

古今圖書集成
部尙書

劉禮

按萬姓統譜禮臨潁人姓醇實器量不凡自幼嗜學久歷仕途才名著稱累官至湖廣左布政使

劉醇

按萬姓統譜醇祥符人能詩善屬文洪武末以儒士起家累官周府長史致仕年九十餘號菊莊先生有菊莊集若干卷行於世

劉政

按明外史方孝孺傳劉政字仲理長洲人孝孺考試所得士燕兵起政草平燕策將上之爲家人所尼旣聞殺孝孺嘔血死

劉端

按萬姓統譜端南昌人建文二年進士遷大理寺丞廉明執法靖難後與同邑王高並坐縱方孝孺息樹陰劓鼻而終高與端同年進士又與端同官或曰高爲刑部郎中

劉才

按名山藏勳封記廣恩伯劉才霍丘人以故元將歸高帝累官指揮僉事從靖難有功洪武三十五年以都督僉事封奉天翊衛推誠宣力武臣特進榮祿大夫柱國侯祿千石子孫世襲指揮同知洪熙中許世指揮使

劉貞

按萬姓統譜貞合肥人以開國功累陞左都督充大寧總兵官修懷來城池改左軍靖難兵起貞及陳亨卜萬引大寧軍出松亭關營沙河欲復遵化亨有二心文皇入大寧盡握其軍以行遂入松亭關貞夜負敕印浮海歸時建文君聞北平諸將降文皇籍貞家下獄俄貞由海道出福建還京詔釋其家後陞左都督鎮遼東恆懷悵憤永樂元年卒貞長女文皇昭順德妃也以故得免於禍次女伊王妃

劉中敷

按明外史劉中敷傳中敷大興人燕王舉兵以諸生守城功授陳留丞擢工部員外郎遷江西右叅

議宣德三年遷山東右叅政進左布政使質直廉靜吏民畏懷正統改元父憂奪情俄召拜戶部尙書瓦剌入貢詔問馬駝芻菽數不能對論斬繫獄釋爲民景帝立起戶部左侍郎居五年卒中數性淡泊食不重味仕宦五十年家無餘貲

劉觀

按萬姓統譜觀長洲人父毅以醫給事燕邸坐法籍入之永樂初念舊臣召觀還爲尙醫賜第一區貴人有所苦皆令觀治之扈從北巡歸卒子博有俊資以古今方散佚論病之淺深不能中博求諸家書及陰陽形法五行星曆靡不究該以醫薦爲掾史己巳之役知博者薦之徐武功素善博引與謀博見徐銳欲白去曹石而視徐面有異曰公旦夕且有不測果驗

劉昭

按明外史史昭傳劉昭全椒人永樂五年以都指揮同知進都指揮使遷都督僉事鎮河州中官使西域罕東曾劄兒加邀殺奪璽書金幣以去命昭討之昭遣指揮祁賢先抵普祿招諭劄兒加請還書幣貢馬贖罪帝以窮寇不足深治納其貢

劉髦

按萬姓統譜髦永新人永樂戊子鄉試易魁後不果仕教授鄉閭學博行莊不干仕進事母以孝稱鄉人化其德所著有易傳撮要修身箴覆瓿集

劉廣衡

按萬姓統譜廣衡字克平萬安人永樂進士授刑部主事用法平恕陞陝西按察副使遷右布政使尋陞右副都御史轉刑部尙書爲人清修簡朴不事浮靡有古人風

劉璉

按崑山縣志璉字廷璉永樂十年進士初任陝西道御史陞山東布政司參政洪熙元年參贊宣府軍務宣德十年兼督邊儲尋轉戶部左侍郎仍兼巡撫公勤廉謹人不敢干以私景泰二年致仕卒於通州貧不能歸遂卽其地葬焉天順三年遣官諭祭遷葬崑山

劉榮

按名山藏勳封記廣寧伯劉榮以小旗從靖難歷中軍右都督永樂十七年以左都督充總兵官鎮

守遼東用捕倭功封奉天翊衛宣力武臣特進榮祿大夫柱國伯祿千二百石賜券與誓身免一死子免一死卒追封侯予諡十八年湍嗣亡子宣德十年弟安嗣天順元年進侯五年加太子太傅卒追贈嶧國公成化十二年兄子瓘嗣子璇予錦衣正千戶瓘卒亡子成化十六年璇仍嗣伯弘治二年佾嗣嘉靖二年泰嗣三十一年允中嗣

劉球

按明外史劉球傳球字求樂安福人永樂十九年進士授禮部主事胡濙薦侍經筵改翰林侍講正統六年王振欲立威邊睡用王驥征麓川球抗疏不用八年雷震奉天殿球應詔上言十事疏入下廷議言球所奏惟擇太常官宜從修撰董璘遂乞改官太常奉享祀事初球言麓川事振固已銜之欽天監正彭德清者球鄉人也素爲振腹心倚振勢爲奸公卿多趨謁球絕不與通德清恨之遂摘疏中攬權語謂振曰此指公耳振益大怒會璘疏上振遂指球同謀逮下詔獄屬指揮馬順殺之球死數年土木之難振被殺朝士擊順斃之而德清自土木遁還下獄瘐死景帝憐球忠諫忠愍球二子長鉞次鈺皆篤學鉞廣東參政鈺雲南按察使

劉矩

按萬姓統譜矩字仲方大名開州人永樂辛丑進士及第矩已取狀元帝夢鶴上殿上翼日檢卷得曾鶴齡遂寘爲第一矩爲第二授翰林編修陞修撰矩方正古朴有至行學問宏深以理爲宗嘗以程明道張橫渠爲準範平生未嘗失口於人爲文溫醇典則筆力遒勁至今鄉邦稱古君子以矩爲首以官養病卒於家祠鄉賢

劉鉉

按明外史劉鉉傳鉉字宗器長洲人生彌月而孤及長割股療母疾比卒哀毀以孝聞永樂中用善書徵入翰林遂舉順天鄉試授中書舍人宣德時遷兵部主事進侍講景帝立九載滿進侍講學士以高穀薦遷國子祭酒尋以母喪歸喪畢赴都陳詢已爲祭酒帝命與詢並任天順初改少詹事踰年卒諡文恭鉉性介特言行不苟讀書至老彌篤

劉銳

按寧洋縣志銳字伯剛登永樂進士授行人陞戶部員外郎乞恩歸省適沙寇鄧茂七作亂銳率衆

力戰被執死之

劉子輔

按江西通志子輔廬陵人永樂間歷官廣東副使左遷交趾諒江知府值黎利來寇子輔死守數月城破子輔遂死

劉用惠

按江西通志用惠永樂間族有誤傷人者父彥昭以族長論死用惠挺身代父繫獄十餘年遇郊免

劉簡

按廣東通志簡字以忠歸善人永樂中以鄉薦爲交趾諒江州判官時寇屢起諒江尤劇簡至宣朝廷威德百度修舉州民相戒不敢犯洪熙元年寇孽黎利叛攻劫郡邑所在皆奔降獨簡城守數月援兵不至城遂陷簡被執不屈死其弟及妻子七人死於井

劉永

按萬姓統譜永字克修大庾人永樂中由進士初授刑部主事陞郎中才名甚著奉勅巡按萬全政